

USC DI LADINS 25.07.2013

La mendranza ladina al ordn dl di

Reprejentanc de mendranzes de duta l'Europa tl Museum Ladin Ciastel de Tor



La delegazion dla FUEV tl Museum Ladin a San Martin de Tor.

Mendranzes - N sada ai 22 de juni 2013 à feter 170 reprejentanc dla FUEV (Föderalistische Union der Europäischen Volksgruppen) vijità l Museum Ladin. I 170 reprejentanc dla FUEV se à ancuntà chëst ann per trëi dis a Persenon per tenì si cungrës anuel. Davia che i ladins reprejentea la mëndra mendranza dl Südtirol ne pudòvel nia mancè na vijita al Museum Ladin Ciastel de Tor che ie n simbol dla ladinità.

L ultim di dl cungrës ie unì

dedicà ala mendranza ladina y nscila à l assessëur per la cultura Ladina Florian Mussner tët l'ucajion per ti splighé la particulariteies di ladins che reprejentea la plu vedla grupa linguistica dl Südtirol. La grupa ie unida acumpañada dala vizepresidënta dla FUEV, la assessëura provinziela Martha Stocker, che à purtà l salut de cësa deberieda cun l presidënt dl cunsëi scientifich dl Museum Ladin, l dr. Heinrich Huber. L presidënt dla

FUEV, l dr. Hans Heinrich Hansen, à reingrazià l Museum Ladin per si ospitalità, laudan la urganisazion y la beliscima strutura. Duc i vijitadëures mustrova n gran nteres per la cultura y dantaldut per la rujeneda ladina.

Per l Museum Ladin fova chësta vijita inò na ucajion per se fé cunëscer a n publich nternaziunel y per la FUEV na puscibltà de stlù ju si cungrës cun belëza. (Cmunicat stampa dla Provinzia)